

綸

扉

奏

草

續彙奏草卷之二十二

催點閣臣第七十七疏

奏爲世事日見艱危微臣終難展布懇乞

聖明速

賜點用以濟因急事該吏部廷推閣臣已十餘日
矣臣亦再揭催請矣尚未蒙

點發此一事也臣五六年間千祈萬懇淚盡而繼
之以血乃奉

俞音下部謂宜朝推上而夕發行也何以猶遲延
如是耶以爲重其事則謀之五六年行之一

奏草

卷三

朝不爲不重矣以爲疑其人則推蔽之五六
年舉之一朝更無可疑矣此而不用更將何
待臣頃者雖奉

命勉出然自省愚陋之資必不足以事

皇上又每日接得各地方官揭帖告報水災百姓
流離困苦幾徧天下臣且讀且泣悲感不勝
各邊軍餉經年不給督撫諸臣岌岌惶惶不
虞外憂而虞內亂母論遠者薊鎮切近京師
在肘腋之下軍士以請糧告變已數次矣而
司農之帑懸罄無以應也長安中百官萬民

聚族而譚日以

福王不之國爲慮訛言四起不忍聽聞此等情勢卽以名世宏才處之猶恐不給而況于臣之庸駑當推敗之後哉自古帝王治天下稱其政務之多曰日有萬幾以萬幾之煩萃于一日而臣以窮年累月十言萬語請之始得一二事是安得而勝請耶且併此一二事又若以爲因臣而行不知臣之所請者果臣之事耶抑亦

皇上之事耶臣一介書生遭逢

聖明一日居官則當一日効力至于天下之理亂社稷之安危其利害禍福皆在

皇上臣無官之日孑然一身以出國門耳亦何苦而嘵嘵之若是哉臣困苦多年不堪焚灼晝不能寐每常望夜夜不能寢又復望晝百憂填集百病俱生其尚黽勉遷延苟旦夕之無死者誠願此地有人國家事有所寄托臣卽溘然淪亡無復餘憾一片赤衷天地鬼神聞之亦當感動竝以

聖慈眷臣如此而顧漠然置之不恤耶臣五六年

祈請此一事至于今日斷無再延之理伏望
聖明卽賜點發毋徒使臣等悲鳴號泣于光天化
日之下也臣不勝激切顙祈之至

萬曆四十一年九月初二日

請武舉監試揭

該武舉期迫監試御史尚無人具題兵部有
疏欲令都察院經歷官推舉題知而該院經
歷又有疏謂從來無廳官題差之理然則武
舉之期必愆誤矣無故而誤

國家之大典傳之天下豈不駭異伏望

聖明卽將該院經歷官本立刻

批下令尚書王象乾署印卽將監試御史題知供
事庶

大典不誤而人情亦安矣

萬曆四十一年九月初七日

因病遣家先歸揭

臣以困苦餘生勉供職焦思鬱結度日如年又閣臣也推不蒙

點用更加憂悶腸胃如焚鬱火上蒸頭目口齒無
不作痛故此兩日不能入直臣只有一子遠
在家鄉呼之未至僅一幼孫在此相依稍解
愁緒今臣病困如此去家六七千里恐一旦
死亡家口難歸不得已遣之先行憐其稚弱
道路間關心甚憂念愁病愈添容少寬二三
日仍勉強入直未敢遽求去也要以臣情景

如此終不能効力以報答

皇上而目前政事乍通復塞通者不能一二而塞者常至十百臣亦終無柰何故其望補閣臣愈迫愈切至于國家大事無過

福王之國臣苦言危言也無不盡統望

聖明留神省覽蚤賜施行臣生則感恩死當不朽矣

萬曆四十一年九月初八日

謝

宣諭併請點閣臣疏

奏爲恭謝

聖諭事該文書官金忠捧出

聖諭諭輔臣朕覽卿所奏情詞苦切知卿爲國焦
勞朕心惻然今國家多事正賴卿匡濟時艱分
猷化理豈可輒居私寓不出卿子雖遠尚有卿
孫爲伴何乃逐之使去可留在京與卿相依卿
不必疑慮言去可卽入閣視事卿屢請皇太子
講學但今秋天氣暴寒其點用閣臣補大僚諸

事朕次第詳檢發行且福王之國前諭已著明
春舉行何乃大小臣工不能仰體上意過爲瀆
擾豈成政體卿宜安心贊襄不必再陳特諭卿
知欽此臣恭設香案弔勉叩頭謝

恩外念臣頃者以鬱火上蒸頭目作痛左眼已盲
只餘右眼亦不能視故暫杜門數日尚當強
出原未敢遽求去也不意復煩

聖明遽發

溫諭且念及弱孫令其在此相依臣闔家頂戴叩
結難酬惟臣奉職無狀累及家人欲及臣之

生存而使之歸昨日已發遣行矣此臣一
之事不足仰煩

聖念惟是閤臣之補萬難再緩臣待此以爲續命
之膏起死回生之靈藥而

皇上尚以詳儉爲言不令臣愈苦死耶一事而遲
至五六年多至百千疏詳已極矣猶復待于
詐耶今新推諸臣皆極一時之選較其才品
皆勝臣百倍

皇上萬不必過於遲疑以孤天下之望也

東宮講學乃

宗社大計

聖諭謂天氣暴寒此固愛惜

東宮之至意然

臣聞

東宮初出講時嚴寒盛暑亦所不輟此在冲齡
尚且如此豈在今日而顧以寒爲慮耶至于
福王之國雖奉

明旨於明春舉行乃庄田之宣索不巳啓行之吉
期未卜天下皆疑廷臣安得不疑天下人皆
欲言廷臣安得不言

皇上必責其瀆擾則瀆擾者莫過於臣臣請先受

其罪但恐此事不了其爲瀆擾當更甚於今

日

祖宗有舊章國家有定制臣子據經守法

皇上亦安得而盡罪之哉

臣祇遵

聖諭容調理數日勉強入直惟此二三大事不行
則臣無辭于天下而臣因愁成病緣病添愁
煎熬銷鑠其能延殘生以事

皇上與否亦非臣所能必也伏望

聖明終始哀臣將閣臣立刻

點用出講之國諸事皆令擇期舉行毋復延滯天

下幸甚愚臣幸甚臣不勝悚息懸望之至謹
因陳

謝附奏以

聞

萬曆四十一年九月十三日

請點閣臣併召原任大學士沈揭

伏蒙

聖恩命吏部推補閣臣臣自此有分任之人可以
少免于天下之罪責不至鬱悶以死感戴之
私非言能悉惟望

皇上蚤點用一日則人情蚤安一日臣亦蚤受一
日之賜而已頃吏部推上七人皆所可用此
在

聖明必有洞鑒乃臣有私懇者年來閣臣日輕而
臣以不才叨冒歲久奉職無狀屢致人言仰

煩

君父爲臣焦心委曲保全臣每念及輒自愧死計
非名德重臣爲之領袖終至顛覆今新推諸
臣其官皆在臣後臣若昂然居首愈無以副
天下之望天地鬼神亦必罪臣豈能一刻居
于此地哉臣見吏部疏中首請

召用原任大學士沈鯉此實中外同情所仰望于
皇上之俞允者甚切鯉忠誠端亮真足當古之大
臣在閣數年未登首輔人皆惜其用之未究
而今日世道人心煩囂至此非鯉亦不能鎮

陛下竊思閣員久曠一旦簡擢必須多用數人又得如鯉者以爲之長則輿論咸孚政本增重新造諸臣得有所表率易于効力而臣亦不至僭冒以增罪愆此實一得之愚不能自已者也爰立大典斷自

聖心臣何敢預惟是一念爲國爲公毫無私意統望

聖明留神裁察臣不勝冒昧悚息之至

萬曆四十一年九月十四日

謝

宣諭疏

附請儲講分封

奏爲恭謝

溫綸事

臣頃蒙

恩宣諭隨具奏陳謝復蒙

聖諭覽卿奏謝朕知道了卿雖偶目疾暫行調攝
卽出贊理卿孫已發遣行尚且不遠還著作速
追回與卿相依爲伴不必過慮皇太子開講知
道了其點用閣臣等事必不遲緩卽檢發行還
著鴻臚寺堂上官宣諭朕意該部知道欽此

臣

恭設香案叩頭謝

恩外再三捧誦

溫綸感

皇上憐臣恤臣高天厚地不足云喻也臣孫已行

勢難再返惟

皇上一言念及臣之祖孫已受

賜無量矣臣家口尚有一二人在此萬不敢復煩

聖念今閣臣已蒙

點用諸事次第發行臣豈敢復有過慮惟是

皇太子出講與

福王之國日期此在

聖心自有獨斷屢旨甚明但臣願

蚤發一日則蚤慰天下一日之望亦蚤省一日之
煩囂耳臣本欲弔勉卽出以目疾未愈尚甚
畏風少俟二三日卽入直供事不敢久杜門
也臣不勝感戴悚息之至

萬曆四十一年九月十六日

入直請簡元臣疏

奏爲感激

天恩力疾入直仍懇

聖明特簡元臣以光政本事臣頃以多病又患目疾給假調理業已旬餘尚未痊愈荷蒙

聖恩兩次宣諭臣不敢久安私寓已於今早電勉入直供事伏念閣員久缺人情惶惶蒙

皇上點用二臣贊襄得人政幾有托此雖

皇上自爲天下計然其所以救臣于水火之中而延其垂絕之命者

功德固無量矣臣之感佩何可言宣惟臣之初意

尚望

皇上多簡數人廣資共濟今

成命已頒不敢再瀆但念內閣之任更重首臣非
德望足以鎮服人心謀猷足以主張國是必
不能稱而臣承乏數載罪戾如山碌碌庸庸
一籌莫展以致壅隔之弊成于上紛爭之習
成于下束手坐觀莫能旋挽即使備員伴食
猶且不堪况敢覲然以居二臣之先哉雖二
臣才德無優足匡臣之不逮然臣循省度惟

終有糠粃在前之懼竊見吏部所請

召用原任大學士臣沈鯉

三朝名德一代鴻儒向在內閣未登首輔遽爾歸
山海內之人無間賢愚貴賤萬口同聲皆以
未究其用爲惜今當此臣僚水火議論參商
之時誠得如鯉其人來居政地爲臣等領袖
天下人情孰不帖服而臣等得承下風協衷
戮力蕩平之業庶幾可望必不至紛紜擾攘
如目前景象貽

君父之憂也

臣

自會推後卽備歷款衷再揭申請

未蒙

俞允今度之事勢萬不可已故敢復陳其愚伏望
聖明特沛溫綸蚤行召用非但少遂愚臣推賢讓
能之私抑亦大章

聖主褒忠求舊之意且毋使天下萬世謂當

聖明之朝有臣如鯉而用之不盡其於光

聖德而裨

聖治更不少矣臣不勝懇切顙祈之至

萬曆四十一年九月二十日

催發同官辭疏揭

該新

簡閣臣方從哲辭疏已經數日未蒙

發下竊惟閣臣故事有兩次疏辭皆當卽行

批發若

留中日久殊非事體且政本需人至爲緊急伏望
皇上卽賜檢發以便受事此臣之不勝顙望者也
其吏部尚書趙煥今早已出城於

朝綱國體所傷實多伏望

皇上亟將煥疏批發或允其去或再勉留至如戶

部郎中賀煥當加

處分以全大臣體面臣愚見如此伏候

聖裁

萬曆四十一年九月十一日

大臣去國疏

奏爲大臣去國日多紀綱日壞懇乞

聖明亟賜裁斷事臣惟國家之所以立紀綱是已
君令臣共進退以禮此紀綱之大者也自年
來議論頗興臣僚求去不遂不得已而至于
掛冠徑行始于小臣漸及大臣九列之間有
詹沂李楨孫丕揚趙世卿閣臣有李廷機而
頃者許弘綱孫瑋趙煥復相繼而行銓衡風
紀之重地爲之一空此千古未見之事也

聖主當陽金甌無缺而

朝端景象遂至于此是尚成世界乎然此非獨
諸臣罪也自來大臣被劾皆引愆杜門伏聽
處分今一掛彈章便須卽去不去則爲貪戀
爲頑鈍無耻如丕揚世卿廷機弘綱孫瑋之
去人皆以爲當然且有嫌其遲矣此其勢之
不得不去者也大臣分義不可則止自來人
主未有不聽人之去宋時范鎮致仕五疏而
後得請人以爲異年來

皇上以眷留爲故事當留者留不當留與必不可
留者亦留耶

閣之辭已竭解組之

命無期進退觸藩無施而可此又其勢之不得不
去者也大臣既處于不得不去之勢而

皇上習見其然亦且聽其自行自止不爲隄防長
此不已臣恐邦國將空而天下之事大壞而
不可收拾矣頃孫瑋行時臣曾屢請

明日准其回藉非爲瑋謀也蓋欲使大臣進退之
惟猶出自

皇上而不至委轡駘銜以決裂其綱維乃竟不蒙
俞允今趙煥之去又二日矣而尚寂然也總憲冢

卿是何等官何等關係而可任其去留付之
不問乎往不可諫來猶可追伏願

皇上卽將煥疏批發或允其去加之優禮如丕揚
故事或念部事繁重老成難得再行追留責
以必返俱在

聖裁其孫瑋疏亦望

批允回籍使不至朦朧以去諸小臣之擅行者皆
明行處分庶國家紀綱猶足存什一于千百矣臣
積愆負罪其欲去之心當去之狀百倍于諸
臣不宜復作此言但目覩事勢如此又不得

不言統望

聖明留神省覽

萬曆四十一年九月二十三日

陳愚衷以維世運疏

奏爲

聖政推行有機人情非忤難挽敬陳愚衷共維世
運事臣竊觀年來中外所喁喁仰望者不過

曰

儲講也

封婚也枚卜也補大僚也起廢也釋繫也今閣
臣補矣滿朝薦等放矣各部所請之國事務
已多得

旨斷在明春無疑矣婚禮亦必不久停矣其大且

難者已見施行其餘當可漸次而舉况有新
臣受事畢力贊襄其功效當百倍于臣臣故
知

聖政之推行誠有機也於此之時使臣工輯睦以
事

皇上天下事自有可爲乃藩籬未破攻擊仍煩遂
令二三大臣相繼去國紀綱爲之破壞邦國
因而將空凡在人倫無不太息且使

聖主愛惜人才保全言路之盛心反與優游不斷
者同類而共譏臣竊嘆之古人上殿相爭多

是國家大事然猶不失和氣今經年執事不
過庚戌之科場荆熊兩御史之行勘呂圖南
之論劾以此三事牽纏不休貽累無數夫此
等事務本不甚關於利害安危若平心而觀
自無難處卽小有不平二三疏而外便可歇
手而舉朝爲之閔然無有寧日果何爲也當
列國分爭與南北朝割據之時則有某國人
與南人北人之名目今天下一家萬姓一
君凡列朝紳皆吾兄弟何地無君子何地能限君
子而畫界分疆判若異域如所謂秦人晉人

楚人齊人荆人云者人旣以此加我我亦以此自稱匪但不廣抑亦不祥又何爲也古人居廟廊之上則憂其民處江湖之遠則憂其君出處各異設心則同近來林下諸臣雖才品不齊然槩其本末立朝皆有可觀去國不以其罪但使于輿論共與者急推以盡其才衆志未同者緩推以觀其後大小各適其宜中外各營其職朋亡群渙自可相安而在朝在野煩言日生又何爲也人才之生最爲難得其才而爲大臣者又經

畫家數十年作養方得成就當此大僚空乏之
秋用人艱苦之日去一人甚易進一人甚難
凡有心胸皆當保惜微瑕小過可以包藏而
門戶一分猜嫌四起牛山濯濯更尋斧斤又
何爲也臣聞之物極必反勢窮必變今人情
厭苦議論極矣紛紛攻擊之譚亦淡然而無
味矣九列寥寥行將盡矣天方悔禍使諸臣
能改心易慮迎

聖主之善機成維新之美政使從前傾陂之習返
爲蕩平隱憂伏禍從此而消則諸大臣雖去

尚有補于世道是

社稷之幸蒼生之福也如或喚前事之未工尋覆轍于無已力務經營循環報復則禍亂之生將在旦夕臣惟有掛冠一去以天下事聽之新臣而已臣每讀史冊見漢唐宋黨人之禍皆與國家相終始私心竊嘆以爲此端必不可開此名必不可立一開此端立此名雖使大有權力如牛僧孺李德裕之輩能驅除蕩滌而遞仆遞興爲禍更酷故常欲彌縫消弭至于犯調停之譏而不恤今雖勢窮力竭而

區區一念終不能自已故復冒昧言之伏乞
勅下部院叅酌議擬如臣言非是當另行分別奏
請以聽

聖裁更望

皇上深惟治亂之幾益發風雷之勇將

儲講大僚起廢諸事悉見施行則人心翕服議
論自消雖有譸張變幻之徒亦無所容其喙
矣臣不勝懇切祈望之至

萬曆四十一年九月二十六日

請發各省巡撫揭

臣惟各省巡撫責任最重地方所視以安危
如山東福建湖廣河南陝西皆海內大藩關
係尤大河南目下又有福藩之國事急須料
理所望于

點用撫臣至迫切也前吏部推上巡撫官七員只
蒙

批發河道李景元山西吳仁度聞景元又病故矣
其各省巡撫已蒙

點用者伏望盡行

批發令其到任管事若日延一日妨誤實多非細
故也又臣所請教習庶吉士官目前開館亦
不容緩併望

檢發臣不勝冒昧祈懇之至

萬曆四十一年十月初一日

頒曆請擇之國日期揭

今日蒙

恩頒曆新歲將臨

皇上齊天之福與年俱增臣不勝欣慰惟

福藩之國古期禮部查

潞王舊例係頒曆之次日擇上欲行欽天監照
例選擇奏請已具本題

知臣愚以爲此

國家大典還須

皇上頒一

明旨下該衙門擇吉方見慎重且使天下曉然知

出自

聖意歡欣頌服于

皇貴妃

福王之令德亦有光矣此

旨仍望

速發若再遲一二日廷臣又來奏瀆反爲不便臣

敢冒陳其愚伏望

聖裁

萬曆四十一年十月初一日

請起廢揭

臣入直不旬日言官相繼攻臣臣臣本當杜門待罪但念

聖恩深重天地父母不足形容臣出未幾若卽行求去恐又費

皇上一番勞心是以赧顏隱忍少待數時另行陳請憊悶之心難以言盡再三思之今日

朝端所以紛擾至此言官所以喧闐至此固由臣之不才貽累

君父亦以大僚人乏無有碩德重望爲海內所信

服者以鎮壓其囂而逆折其奔潰之勢故相持相角無有一日安靜雖以

天威臨之亦無柰何耳當孫丕揚在日力薦原任刑部侍郎呂坤此老成忠愛之苦心殆自有見又原任郎中鄒元標忠直之聲聞于海內田夫野叟亦知其名願其進用

皇上誠急召起此二人處以要地人心必自肅然不敢如前之恣肆其餘如越南星饒仲遂中立鍾羽正林材高攀龍何喬遠劉元珍之輩吏部所屢推舉者亦陸續起用但得十數人

布列

朝端天下事必不至如是之決裂也臣與諸臣

素無相識豈敢有一毫私心以欺

君父但念事勢至此將成大亂非用此一策決不能消弭且以

皇上之

聖德寬仁超軼千古而獨此一事使天下人常有聖世遺賢之恨故不得已冒昧而屢言之伏望

聖明察臣心之無他俯賜採納或特

發一旨明言諸臣懲創已久不忍終棄量與收錄

之意使人曉然知此事之行出自

聖心非臣下所能爲力尤千古之盛事也臣奉職
無狀勢不見容一念愚衷不能自己卽臣亦
自愧其瀆矣

萬曆四十一年十月初五日

剖明 內旨疏

奏爲科部爭論

內旨據實剖明事項兵部主事劉定國疏論吏部
尚書趙煥之留出于

內旨吏科給事中張延登言

內旨之降起于孫丕揚之叅金明時欲

勅諭輔臣查前後

明旨係何人所擬臣見近來議論煩囂不欲置辯

今延登之言及此臣若不據實直陳闕將未

也且今日之爭構不休大率由于己亥之京

察而已亥之京察其最掛人口者在于金明
時之一叅與犯諱之重處臣請得畧陳其概
金明時之考察議處有定說矣臨期考功欲
寬之蓋以其曾論王圖之故湯兆京投一單
言明時意在要挾必不當免蓋卽指論王圖
之疏而言也孫丕揚見之遂謂明時別有要
挾撓亂察事急欲叅處當時凡與察事者皆
以爲不可許弘綱蕭雲舉曹于汴皆極力勸
阻又皆移書托臣代勸謂丕揚誤解要挾之
言失兆京之本意臣亦三書勸丕揚勿叅而

丕揚終不聽也疏上而明時奏辯兩行之中
再犯

御諱中官將此本送至臣寓云

皇上震怒必欲重處臣謂章疏犯諱自有正律此

一時失檢之過不必深罪卽欲罪之當下部

院定擬豈敢徑稟其所以爲明時救解者不

遺餘力許弘綱又再三托臣謂必擬以閑住

始可免罪故臣如其言擬上此當日明時被

處之顛末實是如此未嘗從中出也而秦聚

奎乃引分宜摘陷之事以疑臣母乃過乎至

于大臣被留間用

中旨前此已有不獨趙煥卽煥之疏有經臣擬者
有出

聖裁者臣以爲此皆

皇上眷禮大臣之盛心所當將順何必執爭惟是
事關政幾經由六部九卿而後行者則無問
宮府無論大小當盡

發臣等擬議擬議不當則

皇上裁不容臣等再擬如仍不當則言官糾駁如
此則光明正大人無可疑揆之政體似當如

此又不可以留大臣而例論也總之年來人情因

皇上深居日久上下不接遂以爲

皇上毫無成心百凡舉動皆有人能高下其手用一人則曰此何爲而用行一事則曰此何爲而行卽臣等在外與

穆清遠隔尚且見疑而况于左右近習之人乎此所以每有

內降輒揣摩多端而不知

皇上下聖至神萬幾雖煩無一事不斷自

奏草

卷三

三

聖心如臣等稟擬亦多

皇上改正何人敢于竊弄延登所云中璫播弄
皇上不知者臣萬萬保其必無此諸臣過計而臣
不得不為剖明者也伏望

聖明將臣此疏發下部院仍

賜明示以釋群疑亦目前解紛之一端耳臣不勝
悚息之至

萬曆四十一年十月初七日

請擇之國日期揭

該臣於頒曆之日具揭請

勅該衙門擇

福藩之國吉日時在廷諸臣皆欲叩請因見禮
部疏得

旨云少俟卽有旨下臣因勸諭諸臣
聖心已定不必煩瀆今已旬日未見

旨下人情又疑故禮部不得已再申前請且光陰
迅速轉眼便是明春此時若不擇吉更待何
時此非但天下人疑之卽臣亦不能無疑非

但臣言不足取信卽

煌煌明旨亦不足取信而其爲猜忖億度殆有不
可勝言者矣此事日延一日歲延一歲至于
明春決無再延之理若明春再延則中外喧
嚷

朝廷無一刻寧靜

福王卽留在此中何以自安何如蚤發一日使
人心蚤定一日之爲愈也至于庄田之利害
可否則臣前屢揭已極詳明更望

聖明加意省覽必不可因此留行以滋天下之疑

惑耳臣見廷臣紛紛且欲伏

闕陳請故不敢不言統望

聖明速賜裁斷

萬曆四十一年十月初十日

請止阮昇抽稅揭

臣惟抽稅一事海內困苦已極然他處稅額止于數萬地方猶能勉答應獨廣東一省至十七萬粵民苦累難堪加以李鳳李敬之剝削皮毛俱盡痛入心骨幸

皇上先歲撤回李敬稍寬一分然而十七萬之稅終爲難辦臣但逢廣東士民無不疾首蹙頞如坐湯火中時刻難度翹首企足以望

蠲免頃聞李鳳病篤皆以爲沐

恩有機而阮昇之

命又下矣假使鳳未卽死是有兩鳳卽鳳死而昇代之其誅求騷擾必更甚於鳳此粵人之所以痛哭籲

天而言官之所以紛紛執爭不能自己也臣觀阮昇請勘合疏中已言沿途答應不敷卽行叅究則其不肯安靜之意已自可見傳之中外豈不驚駭竊恐粵民間風愈生恐怖額外之多事日甚一日矣

皇上天覆地載煦育群生

恩加中外者已四十載于茲顧獨恐此一方民

乎以臣愚慮止阮昇勿行

亟勅地方官如李鳳病故卽將遺下錢糧查明解
進此粵民之大幸也卽必欲遣昇行亦

明勅到彼卽回母得騷擾致生事端以少安粵人
之心亦其次也至于十七萬之稅銀委實難
支萬望

皇上哀憐此邦生靈之困苦大賜減省使得生全
將萬口同聲歡呼頌祝

國家無疆之慶行在于此矣臣不勝悚息冒昧
之至

奏草

卷五

三

萬曆四十一年十月十一日

請點江淞按臣發同官辭疏揭

今日署都察院事尚書王象乾見臣謂淞江按臣去任日久巡撫亦已奉

旨回籍地方撫按俱缺無人彈壓甚爲可慮江西巡按久已散滿無之有病杜門謝事江淞皆海內大藩巡按官關係甚重托臣催請臣見此本三日前已蒙

皇上欽點發票計旦夕必下而象乾之言懇切如此故敢冒昧一言伏望

皇上卽將原疏

檢發使巡方有人免致稽延誤事是該省之幸也
又新簡閣臣方從哲有辭疏

留中六七日未發不便到任閣中乏人所望贊襄
甚急併望

亟行檢發促令到任臣不勝懇切之至

萬曆四十一年十月十一日

請發同官辭疏吏部署印江浙巡按官揭
該新閤臣方從哲辭疏已上十二日未蒙
儉發臣惟閣臣被

命例有再辭從哲多此一辭臣恐其仰煩

聖心曾力阻之而從哲過自謙讓復有此疏留中
日久事體不便母論臣之孤苦急望贊襄卽
以

皇上七年慎重方簡用二臣而因其控辭又延緩
若此傳之天下殊不雅觀且何以責將來之
展布也伏望

聖明亟賜檢發促令到任於以重政本而昭

德意其關係良不淺矣又吏部掌印缺官部務停

閣前月該選教職此月又該大選必難再緩

其吏部司務官請署印本亦望

速發以便供事至于都察院題差江西瀋江巡按

官已蒙

點用擬上併望檢發此皆不容已事務故臣敢冒昧而再請之臣不勝悚息之至

萬曆四十一年十月十六日

題奏吏部署印揭

蒙

發擬吏部司務官請署印本臣查得見在尚書只有王象乾劉元霖二人而王象乾資序官階在前當署吏部但見在署都察院不便兼署故臣擬象乾改署吏部而以元霖代署都察院或卽令元霖署吏部亦無不可統在

聖裁

萬曆四十一年十月十八日